

141
13. marz

ERINDISBRÉF

fyrir fiskmatsmenn.

1. gr.

Fiskmatsmenn eiga að leggja stund á að verða sem færastir í starfinu til þess að geta dæmt um gæði fisks af öllum þeim verkunaraðferðum, er undir fiskmatið heyra. Þeir skulu hafa lokið prófi frá fiskiðnaðarnámskeiðum, er fiskmatsstjóri veitir forstöðu. Þó getur fiskmatsstjóri fyrst um sinn veitt þeim saltfiskmatsmönnum undanþágu frá slíkum námskeiðum, er störfuðu sem saltfiskmatsmenn fyrir ársbyrjun 1949. Undanþágur í þessu efni miðast þó aðeins við saltfiskmat og skreiðarmat.

2. gr.

Fiskmatsmenn skulu jafnan hafa það hugfast, að þeim ber að vanda til matsins eins og þeim er frekast unnt, svo að álit íslensks fisks á erlendum markaði megi verða sem bezt.

3. gr.

Fiskmatsstjóri er yfirstjórnandi matsins, en nánasti yfirboðari fiskmatsmanna er yfirfiskmatsmaður í umdæmi því, sem fiskmatsmaðurinn starfar í. Fiskmatsmenn eru aðstoðarmenn yfirfiskmatsmanna við mat og alla umsjón með fiskinum, þangað til hann er kominn í útflutningsskip eða fluttur burt af starfssvæði þeirra.

4. gr.

Fiskmatsmenn skulu kynna sér rækilega gildandi lög um fiskmat, svo og reglugerðir og fyrirmæli, sem gefin eru út samkvæmt lögnum. Þeim er skylt að haga mati sínu og eftirliti eftir ákvæðum þessara fyrirmæla, svo og eftir fyrirskipunum yfirfiskmatsmanns og fiskmatsstjóra.

5. gr.

Komi einhver þau atriði fyrir við mat eða eftirlit fiskmatsmanna, sem ekki eru skýr ákvæði um í reglugerð eða gefnum fyrirmælum, eða þeir eru í vafa um einhver slík atriði, skulu þeir leita til yfirfiskmatsmannsins eða fiskmatsstjóra og fá fyrirskipanir um, hvað gera skuli. Verði þessu ekki við komið, skulu þeir gera það, sem þeir álita réttast, og skýra síðan yfirfiskmatsmanni frá því sem fyrst og áður en fiskmatsvottorð er gefið út um vöru þá, sem vafaatriðið snertir.

Þeir skulu og skýra honum frá og leita hans, ef þeim er sýnd óhlýðni við matsstörfin eða ef framleiðendur eða vinnufólk vikur frá gildandi ákvæðum reglugerðar eða annarra fyrirmæla um mat og eftirlit.

6. gr.

Fiskmatsmönnum er skylt að gefa yfirmatsmanni eða fiskmatsstjóra skýrslu um fisk þann, er fiskmatsmaðurinn hefur metið eða haft umsjón með. Fiskmatsstjóri segir fyrir um, hvernig slíkar skýrslur skuli vera.

Fiskmatsmaður má ekki gefa út fiskmatsvottorð nema eftir fyrirmælum yfirfiskmatsmanns og í umboði hans, enda ber yfirfiskmatsmaður ábyrgð á vottorðinu, sjá þó 15. gr.

7. gr.

Fiskmatsmanni er skylt að framkvæma störf yfirfiskmatsmanns, er yfirfiskmatsmaður kveður hann til þess í forföllum sínum eða fjærveru. Ef störf þessi

falla ekki saman við hin venjulegu störf fiskmatsmannsins, svo að hann þurfi vegna yfirmatsstarfsins að hafa sérstakt ómak eða bið, t. d. við afgreiðslu skipa, skjala eða annars, ber honum þóknun frá viðkomandi útflytjanda eða framleiðanda, í hlutfalli við tíma þann, sem til þessarar sérstöku þjónustu er varið.

141
13. marz

Ef fiskmatsmaður þarf, vegna þessara sérstöku starfa, að takast ferð á hendur út fyrir þann stað, er hann á heimilisfang í, fær hann, auk hinnar venjulegu greiðslu fyrir vinnu við matið, fæðispeninga, ferðakostnað og greiðslu fyrir dvalardaga. Ef hlutaðeigendur geta ekki komið sér saman um slíkan kostnað, úrskurðar atvinnumálaráðuneytið reikningana, að fengnum tillögum yfirfiskmatsmanns og fiskmatsstjóra.

8. gr.

Fiskmatsmönnum, sem eingöngu starfa við hraðfrystihús, er einkum skylt að gæta þess, að fylgt sé ákvæðum V. kafla reglugerðar um fiskmat og meðferð, verkun og útflutning á fiski, nr. 81 13. marz 1950, svo og II. kafla sömu reglugerðar. Að sjálfsögðu ber þeim einnig að fara eftir öðrum ákvæðum reglugerðarinnar og annarra fyrirmæla, er starf þeirra snertir.

9. gr.

Heimilt er, að matsmaður, sem hefur á hendi mat á freðfiski hjá frystihúsi, annist einnig önnur störf, svo sem verkstjórn eða annað, sem ekki bindur hann við fast verk, þannig að hann geti ekki fylgzt með allri vinnslunni. Fyrir að annast um matið fær hann þó greitt hjá atvinnurekanda þóknun, sem nemur 20% af gildandi verkamannakaupi á hverjum stað, miðað við 25 átta stunda vinnudaga á mánuði.

Fiskmatsmanni, sem starfar að staðaldri í saltfiskframleiðslustöð, er einnig heimilt að meta saltfisk til útflutnings hjá sama fyrirtæki og hann vinnur hjá, eftir ákvörðun yfirfiskmatsmanns, í hvert sinn sem saltfiskur er metinn og pakkaður þar.

10. gr.

Fiskmatsmönnum, sem starfa að saltfisksmati og mati fisks, sem á að flytja út nýjan (þ. e. ísvarinn), er einkum skylt að gæta þess, að fylgt sé ákvæðum II., III. og IV. kafla fyrrnefndrar reglugerðar um fiskmat og meðferð og verkun fisks, eins og þeim einnig ber að fara eftir öðrum ákvæðum reglugerða og fyrirmæla, er snerta starf þeirra.

Yfirfiskmatsmaður kveður þá til vinnu og segir þeim fyrir verkum.

Aðalstarf þeirra er við fiskmat á þeim stað, sem þeir eru skipaðir. Þó eru þeir skyldir til að fara til annarra staða í umdæmi yfirfiskmatsmanns, þegar hann kveður þá til starfa þar við fiskmat.

11. gr.

Fiskmatsmenn þeir, sem 10. gr. fjallar um, fá ákveðið kaup um hverja klukkustund fyrir vinnu sína. Sé það miðað við almennt verkkaup, sem um er samið milli atvinnurekanda og verkamanna í þeim bæ eða héraði, sem fiskmatsmaður er búsettur í, eða það kaup, sem kann að verða lögboðið, að viðbætti 40% uppbot á hin almennu vinnulaun á hverjum tíma. Þetta kaup fá þeir fyrir alla vinnu við fiskmat, hvort sem það er við flokkun fisksins, umsjón með vigtun hans, útskipun, hleðslu eða annað.

12. gr.

Kaup fiskmatsmanna fyrir mat og eftirlit, eins og það er ákveðið í 9. og 11. gr., gjalda þeir, sem fiskurinn er metinn fyrir, og eiga matsmenn heimtingu á að fá kaup sitt greitt eftir reikningi. Verði deila milli fiskmatsmanna og eiganda fisks, fer um úrskurð hans eins og sagt er í 7. gr.

141

13. marz

13. gr.

Þegar fé er veitt til þess, má samkvæmt 12. gr. laga nr. 46 5. apríl 1948, fela fiskmatsmanni að hafa, á vissu takmörkuðu svæði, eftirlit með því, að ýmis ákvæði nefndra laga og reglugerða, sem settar eru samkvæmt þeim, séu haldin, svo sem ákvæði um aðgerð fisks, útbúnað fiskiskipa, áhöld og fleira, er varðar mat og meðferð fisksins.

Fyrir slík störf fær fiskmatsmaður, sem til þess er ráðinn, kaup eftir samkomulagi í hvert sinn. Fiskmatsstjóri gefur honum sérstakt erindisbréf um þetta starf.

14. gr.

Lögreglustjóri löggildir fiskmatsmenn, samkvæmt tilnefningu fiskmatsstjóra, er velur þá í samráði við yfirfiskmatsmenn. Skulu fiskmatsmennirnir undirrita eiðstaf um, að þeir vilji með alúð og kostgæfni rækja skyldur þær, sem á þeim hvíla í starfi þeirra.

Fiskmatsmenn eru skyldir að sætta sig við þær breytingar, sem gerðar kunna að vera á erindisbréfi þessu.

15. gr.

Sannist þær misfellur á störfum fiskmatsmanns, er álíta verður, að stafi af víta-verðu gáleysi eða vanrækslu, ber hann ábyrgð á tjóni því, er af því leiðir. Auk þess má svipta hann stöðu sinni fyrirvaralaust.

Um hegningu fyrir brot fiskmatsmanna og annarra eiðfesta starfsmanna fiskmatsins gegn ákvæðum fiskmatslaganna, fer að öðru leyti eftir hinum almennu hegningarlögum.

16. gr.

Hér með er úr gildi fellt erindisbréf fyrir fiskmatsmenn nr. 71 3. júlí 1933, ásamt breytingu á því, nr. 26 7. febrúar 1941.

17. gr.

Erindisbréf þetta er sett samkvæmt lögum nr. 46 5. apríl 1948, um fiskmat og meðferð, verkun og útflutning á fiski.

Atvinnumálaráðuneytið, 13. marz 1950.

Jóhann Þ. Jósefsson.

Gunnl. E. Briem.

142

16. júní

REGLUGERÐ

fyrir Vestmannaeyjaflugvöll, um umferð, öryggi o. fl.

1. gr.

Almenn ákvæði.

Flugvallastjóri ríkisins eða umboðsmaður hans veitir einstaklingum eða félögum heimild til að nota Vestmannaeyjaflugvöll vegna farþegaflugs, póstflugs, kennsluflugs o. þ. h. Þegar slíkt leyfi til afnota af flugvöllinum er leyft, skal leyfshafi verða háður þeim ákvæðum, sem í gildi eru eða sett verða um greiðslu lendingargjalda, flugskýlisleigu o. s. frv., ásamt þeim skilmálum öðrum, er settir kunna að verða. Sérhvert loftferðafyrirtæki, sem starfrækt er á flugvöllinum, skal skila flugvallastjóra ríkisins mánaðarlega skýrslum eftir á um fjölda farþega og magn flutnings, sem farið hefur um flugvöllinn á þess vegum í mánuðinum.